

Date – 01/05/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kawngpui NH-306 huamchhung Kawnpui leh Khamrang inkara ram neitute chu 4-Lane atana ram lak turah ram neitu dik tak chauhin an phu tawk compensation an lak mai tur thu leh sumdawna atana hman tur anih loh thu hrilh an ni
2. Serchhip YMA Sub Hqrs Serchhip rorel inkhawm nimin khan neiin, Serchhip Dist tan MYC Coaching centre nei tur a hma lak an rel
3. Outer Manipur Parliament seat-a polling station parukah vote thlak that chu nimin khan tluang taka zawhfel a ni.
4. Election Commision chuan Lok Sabha inthlanpui thawhkhatnaa vote zaa 66.14 a tlak laiin inthlan thawh hnihnaa zaa 66.71 a tla tih a sawi.



KOLASIB NH 306 COMPENSATION

Kawngpui NH-306 huamchhung Kawnpui leh Khamrang inkara ram neitute chu 4-Lane atana ram lak turah ram neitu dik tak chauhin an phu tawk compensation an lak mai tur thu sumdawna atana hman tur anih loh thu hrilh an ni.

Kolasib Addl DC DC Pi Melody Ngurthantluangi, Competent Authority for Land Acquisition CALA ni bawh chuan nimin khan ram neitute hi ko khawmin hun kal tawha sorkar in ram a lakna a thil thleng tawh ah fimkhur a tul zia an hriat avanga in kokhawm annih thu a sawi a, NH-306 (Silchar - Aizawl panna kawng) a Kawngpui thlur li siam tura ram neitute hnenah zangnadawmna pekchhuah tawh, Package dangah thil diklo leh felhlel tam tak a awm ni a a lan avangin tuna hmabak Package 7-na ah hi chuan theih tawp chhuah in dik thei ang bera ram teh tum anih thu leh ram neitute hnenah zangnadawmna fel fai taka pek chhuah anih theih nana fimkhur taka kal an tum thu a sawi.

Package danga Compensation dawngtu zingah mahni ram awmna pawh hrelo, an ram zau zawnga nena in millo tih hriat reng khawpa thlai leh thil dang dang awm anga assess leh pawisa duh vanga vir buai huai huai an tam thu a sawi a. Tuna hma an lakna turah hi chuan thamna leh diklo taka in bum tumna te, ram leh thlai awmte hlutna bakah thil tih tumna a awm an remtih dawn loh thu a sawi a. Ram teh hunah ram neitu ngei emaw, compensation dawngtu tur ngei emaw a hmunah awm theuh turin a chah a ni.

He hunah hian Kolasib DC office a SDC Dr. Lalramdintluanga, '4-Lane Branch Officer' chuan thu sawiin, ram neitute chuan ram teh ni ah lehkha fel

fai tak an ken a tul thu a sawi a, Package danga zangnadawmna (award) tur tihfel tawh ah pawh a dawngtu tur dik tak te hnenah chauh sum pek chhuah anih tur thu sawiin, thil fel failo hriat chhuah anih chuan sum pek chhuah anih loh tur thu a sawi a. Ram pass pakhat chhunga compensation dawngtu tur 2/3 emaw an awm chuan Bank ah Joint Account siam in, PAN card pawh siam ngei turin a chah a ni.

<><><>

HEAT-WAVE

National Programme on Climate Change and Human Health (NPCCHH) hnuaiia State Nodal Officer Dr. Vanlalrengpuia Chinzah chuan, tunlai khawlum vangin natna hrang hrang a thleng thei mekah, heng natna lakah hian mipui an him theih nan leh hriselna vawn theih nan tui thianghlim vawt lutuk lo in tam a pawimawh tih a sawi.

Akashvani zawhna chhangin Dr. Vanlalrengpuia chuan khawlum zual zel karah sawrkar laipuiin khawlum laka invenna tur hrang hrangah mipuite chu thurawn a pe tih sawiin, chhun dar 12 leh chawhnu dar 3 inkarah ni sa hnuaiia chhuah tam loh a tha a, chawhnu lam khaw lum zual laiin pawn lama hna hahthlak thawh loh a pawimawh a, pawn lama hna thawk thinte pawh ni sa chu a lawnga do lo tur leh, an hnathawhna hmunah a theih ang anga daihlim siam tur in a chah a, kum upa leh natna neite chu a theih chuan ni tin an hriselna dinhmun enfiahsak a tha tih a sawi baw.

Health Department sawi dan chuan, khaw lum zel vang hian – khaw lum bawl, kut, ke leh kerek vung, tha chat, thidang leh kaih te tawrh theih a ni a, heng bakah hian khawvel lum zel vangin sikserh (malaria), kawtha lo, thawhah leh vun cancer te pawh pung zel thei a ni an ti a, hengte avang hian mipuiin zirtirna tha an dawn a pawimawh tih sawiin, mipui te chuan inven chu tih dam aiin a tha zawk tih an vawn reng a pawimawh an ti.

NPCCHH Consultant Pi Rosie Zosangkimi chuan March, April leh May thla te chu India Meteriological Department (IMD) in khaw lum chhoh hunlai tia a vuah a ni tih a sawi a, India ram hmun dangte angin hmar chhak chuan khaw lum hi tuar na lutuk lo mah se Mizoram pawh a tuam ve mek tho, a ti.

NPCCHH hi sawrkai laipua Ministry of Health and Family Welfare department chuan National Health Mission hnuaiiah kum 2019 February thla khan a rawn din tan a ni a. A thil tum tlangpui te chu sik leh sa inthlak danglam nasa leh dan pangngai pel a khawchin lo danglam thin, heng khawlum lutuk te, khaw vawt lutuk te, cyclone te, lirnghing te, tuilian leh a dangte avanga thihna, natna, inhliam palh leh rilru lam leh hriselna dangte thleng a nghawng thei te tih tlem a tihzia awm a ni.

<><><>

SERCHHIP YMA

Serchhip YMA Sub Hqrs Serchhip rorel inkhawm nimin khan neiin, Serchhip Dist tan MYC Coaching centre nei tur a hma lak an rel a. YMA Sub Hqrs Serchhip Rorel inkhawm vawiin khan Serchhip Auditorium ah nei a ni a, President Pu Kawlthuama'n a kaihruai a ni.

Rorel tura thu chhawp chhuah -YMA khawih 4 pass vek a ni a, sorkar khawih rel tur 7 lutah 6 an pass a. Rorel thu pass langsar zual zingah Mizoram Youth Commission (MYC) Coaching Centre Serchhip District-ah hawn a nih theih nan Sub-Hqrs. YMA in hma la rawh se tih te, Lamchhip kaltlanga Chhiahtlang to Hmuifang kawng Blacktop a nih theih nan hma lak nise, IAS Cadre Allocation Policy 2019 AGMUT Cadre-ah Mizoram Cadre hran a neih ve theih nan hmalak ni rawh se tih te, Raltlan te tun aia khuahkhirha enkawl ni rawh se tih te a tel a,

Sorkarin YMA ruihhlo ngai te enkawl na tur Home Serchhipa a din theih nan hma lak ni rawh se tih te, Serchhip Kikawn to Lungpho kawng Jeepable Road hi tun aia changtlung zawka siam a nih theih nan Sub-Hqrs. YMA in hmalak ni rawh se tih te a tel bawk a.

Heng bakah hian YMA hmalakna tur chi -Ramngaw, Tuihna leh nungcha humhalh kawngah Sub-Hqrs. YMA hian chak zawka hmalak nise, hma la pha te lawmman siam ni se tih te an pass bawk

He hunah hian kum khat chhunga sum cheng nuai 11 sing 4 & 800 hmuh dan tur ruahmanna -budget an pawm a. Fa 10 nei Pu R.Siamkima New Serchhip te nupa bakah fa 7 ve ve neitu, Pu Lalchhuansanga Hriangtlang branch leh Pu K.Lalengkima Chhingchhip Venglai te te chawimawina hlan an ni a. Sub hqrs YMA huam chhunga member thi 270 an sun a, thi zinga 62 chu hmeichhia an ni a.

<><><>

OUTER MANIPUR RE POLL

Outer Manipur Parliament seat-a polling station parukah vote thlak that chu nimin khan tuang taka zawhfel a ni a. Vote zaa 81.16 a tla. Repolling hi zing dar 7 atanga tla dar 4 thleng buatsaih niin Ukhrul district-a polling station panga leh Senapati district-a polling station pakhatat vote thlak that a ni a. Heng polling station ah te hian April ni 26 khan inthlan thawhnhinaah vote thlak a lo ni tawh a, EVM tihchhiat leh tharum thawhna thleng avangin vote hi thlak that tir an ni a.

Nizan khan heng polling station a vote thlak thatna EVM te hi district headquarters an him takin an thleng niin venhim hna thawktuten an sawi.

<><><>

CONGRESS

Congress chuan Lok Sabha inthlan kal mekah an candidate tur pali an puan belh. Haryana-a Gurgaon seat a ding turin Congress hian lemchanchiam politician-a inlet Raj Babbar an thlang a. Union Minister hlui Anand Sharma chu Himachal Pradesh-a Kangra ah a ding ang a, Himachal Pradesh-a Hamirpur bialah Satpal Raizada a ding bawk ang. Hei bakah hian Maharastra-a Mumbai North a ding turin Bhushan Patil ruat a ni bawk. Candidate tharte hi Congress Central Election Committee ten an thlitfim hnua an pawm a ni.

<><><>

ECI VOTER TURNOUT

Election Commission chuan Lok Sabha inthlan thawh khatna leh thawhnhinaah vote tla zat kimchang a tichhuak a. Inthlan thawhkhatnaah khan vote zaa 66.14 a tla a, inthlan thawhnhinaah vote zaa 66.71 a tla thung a.

EC sawidanin inthlan thawhkhatnaah voter zaa 66.22 chu mipa niin zaa 66.07 chu hmeichhia an ni a. Hetihlai hian third gender hi zaa 31.32 an awm bawk a ni. Inthlan thawhnhinaah voter zaa 66.99 mipa an nih laiin zaa 66.42 hmeichhia an ni a. Third gender zaa 23.86 an awm bawk a ni..

<><><>

AIR POLLUTION

Kathmandu chu khawvela boruak bawlhhlawhna ber khawpui a ni mek a. Nepal Ministry of Health and Population chuan an khawpui boruak a hriselloh em avang hian mipuite chu mask vuah tha turin an ngen a. IQAir in khawvela khawpui 101 boruak dinhmun a tehnaah Kathmandu chu khawpui boruak bawlhhlawh berah a paung a. Khawpui bawlhhlawh zual zingah hian Kathmandu dawtah hian New Delhi, Thailand-a Chiang Mai khawpui, Vietnam a Hanoi, Bangkok leh Bangladesh khawpui Dhaka te an awm a. Heng khawpuia chengte hi a tul tawpah lo chuan pawna chhuak tam lo tura ngen an ni a, khualzinte pawh tlawh tam lo tura ngen an ni bawk.

Boruak bawlhhlawh air pollution hian lung leh thisen zamte, chuap, thluak, mit, hnarm beng leh hrawkna a thlen thei a. Hei bakah hian asthma, cancer leh natna dang neih theihna chance a ti sang bawk a ni.

<><><>